

Date – 27/03/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Sikul Bungraw Inthleng Runpui – Reduce, Reuse, Recycle Centre – RRR Centre hmuna neih chu tunah hian District khawpui zawng zawngah kalpui mek a ni.
2. Art & Culture Minister Pu C Lalsawivungan Mizo ten History dik an neih theih nan sorkarin hma nasa takin a la a ti.
3. Parliament chuan Banking Laws (Amendment) Bill 2024 a pass
4. Union Food and Public Distribution Minister Pralhad Joshi chuan eitur pawlh danglam veng turin sawrkar chuan chak takin hma a la tih a sawi.

<><><>

SWAP & SAVE

Urban Development & Poverty Alleviation department buatsaih Sikul Bungraw Inthleng Runpui – Reduce, Reuse, Recycle Centre – RRR Centre hmuna neih chu tunah hian District khawpui zawng zawngah kalpui mek a ni a.

A bultanna chu Aizawl ah ni 19 khan UD&PA Minister Pu K. Sapdanga'n hawngin, Centre pasarih (7) ah RRR Centre hi ni 19 atanga ni 21 chhunga kalpui a ni a. Ni 24 atang khan UD&PA Sanitation Site Office, Solomon's Cave Opposite ah ni 28 thlenga hawn turin pawhsei leh a niin, March ni 26 atanga ni 28 thleng District khawpui tinah kalpui a ni bawh ang.

Aizawl khawpui bikah Sikul Bungraw Inthleng Runpui neih chung ni thum chungin mi 1000 chuanguin tlawh tawhin, sikul bungraw hlui thawh zat hi 7172 niin, lak chhuah zat hi 3346 a ni a. Hun pawhsei leh a nih hnu March ni 24 atanga vawiin thleng hian sikul bungrua 263 lut tawhin, 678 lak chhuah tawh a ni.

Sikul Bungraw Inthleng Runpui hi mipuiten an hlut hle a, sikul mamawh hluihlawn tawh bawhlhlawha chang mai tur te a hmang tangkai tur te hnen ngei a thleng thei a. Mamawh tih tlema bawhlhlawh ngah lo turte, hluihlawn bawhlhlawha chang mai tur hman nawnna tur ngaihtuah dan te, bawhlhlawha chang tur thawmhnaw leh bungrua hmantlaka siam danglamna (recycle) kawngah mipui ten hmasawnna leh ngaihtuahna thar kan neih ngei theihna tura inzirtir hi he 'Swap & Save' in a tum a ni.

<><><>

SWMC fire

Aizawl khawpui Bawhlhlawh paihna Solid Waste Management Centre (SWMC) Tuirial ami chu a kan avangin khar rih a ni.

Aizawl Municipal Corporation chuan thuchhuah siamin, kangmei chhuak avangin hun engemawtichhung chu bawlhhlawh paih theih a ni dawn lova, hei vang hian khawpui chhunga bawlhhlawh khawn a ni dawn lova, bawlhhlawh te tuihawk luankawr leh a dangte ti bawlhhlawh zawnga tiriral lova khawl tha turin mipui a ngen a ni.

Bawlhhlawh paihna hmun khar hun chhung tur hi sawilawk theih a ni lo tih AMC thuchhuah chuan sawiin, kangmei chhuahna hmun hi tlawhpawh phal a ni lo tih a sawi bawk a ni.

<><><>

ART& CULTURE

Art & Culture Minster Pu C Lalsawivungan Mizo ten History dik an neih theih nan sorkarin hma nasa takin a la a ti.

He thu hi nimina Dungtlang khuaa Thangchhuah Mual Lungphun hawнна leh Lianchhiari leh Pasaltha Lalhminglana Lungphunnaah sawiin Minister Pu C. Lalsawivunga chuan, Mizote History ziaк chu a dik lo tihna lam ni lovin a famkim tawк lo a ni, a ti a. History famkim zawк chu thlalaiten neih an duh a. Nikum lama Art & Culture Dept leh Lunglei HATIM ten North Eastern Council Shillong atanga tanpuina an hmuh angin nikum November atangin Dungtlang hmun hlui leh thlan hlui te endik hnathawh tan nghal a ni a. Kumin February ni 25 thleng khan Dungtlang Khaw hmun hlui a hmanlai thlan leh hmun hluite chu Archaeological Survey of India (ASI) ten an lai a ni a ti. Dungtlung thlanmual hlui a ruhro an laichhuah ang te chu Becca Laboratory Florida, USA-ah thawn a ni a. Nimin khan chung ruhro enfiah tura thawn thlak te result chu a chhuah thu leh ASI in an ruhro a laihchhuahte chu kum 1740 atanga kum 1800 AD chhung ami nia hriat a ni a ti.

DNA enfiah leh thil chi dang enfiah turin Birbal Sahni Institute of Palaeosciences, Lucknow ah ruhro sample test turin thawn niin a result a chhuah vat beisei a ni a. Bel lei te, bel keh them, thir them sample ang chi te pawh chu nikum November khan phai lamah thawn alo ni tawh thu a sawi bawк a ni.

He hun hi Health Minister Pi Lalrinpuii pawhin a hmanpui a, Thangchhuah Lungphun, Lianchhiari Lungphun leh Pasaltha Lalhminglana Lungphun hawнна hun hman a ni a, thangchhuah lung hi Pu Lalduhoma, Pu Zoramthanga, Pi Lalrinpuii, Pi B.Sangkhumi, Pu David Zohmangaiha leh Jeremy Lalrinnunga te hminga phun a ni.

He hun hi Pipu Sulhnu Humhalhtu Pawl Organising Committee buatsaih niin kum 1997 khan mi 52 te thangchhuah lung an lo phun tawha, vawiina mi parukte nen helai hmuna thangchhuah lung phunte hi mi 58 an tling tawh a ni. Organising Committe lam chuan Mizo hnam tana mi hming tha te tan he Thangchhuah lung hi phun zel an tum thu an sawi bawк a ni.

<><><>

PURPLE FESTIVAL

Lungleiah vohbikte tana intihhlimna kut, “Purple Fair for Persons with Disabilities” chu nimin khan buatsaih a ni a. Lunglei High Powered Committee (HPC) Vice Chairman Pu V. Malsawmtluanga chuan he hun hi a hmanpui.

Lunglei HPC Vice Chairman Pu V. Malsawmtluanga chuan Lungleia a vawi khatnan vohbikte tana Purple Fair buatsaih a ni chu hlu leh lawmawm a tih thu sawiin, sawrkar laipui leh Mizoram sawrkarin vohbikte hmasawnna a ngai pawimawh a, an tan theih tawpin hma a la tih sawiin, an hmasawnna leh hamthatna tur dan tha tak tak pawh duan a nih thu a sawi a. Mizoram sawrkar hna lakah pawh vohbikte tan post hauh thin niin, vohbik tam takin mahni kea din nan leh chhungkaw chawm nan an hmang tawh a ni a ti.

Lungleia Purple Fair hawnna hun hi Lunglei District Samagra Shiksha DPO Pi K. Lalrintluangi'n a kaihruai a. Artificial Limbs Manufacturing Corporation of India (ALIMCO) Pradhan Mantri Divyasha Kendra (PMDK) te'n Lungleia assessment camp an buatsaih atanga wheelchair, bengdar, mitdel tiang leh hmanraw dangte dawng tur an thlante hnenah hmanraw hrang hrang sem a ni a.

Purple Fair ah hian vohbikte thil siam chi hrang hrang pho chhuahna leh zawrhna siam a ni a. TNT Home Lunglei, Training Centre for Specially Abled Persons Lunglei, ALIMCO PMDK Aizawl leh vohbik mimal pahnih dangin dawr hi hawngin, an thil siam chhuah hrang hrangte an phovin an zuar a ni.

Lunglei Purple Fair-ah hian TNT Home Lunglei, Onyx Special School Lunglei, Jehova Nishi School, Play Stop, Training Centre for Specially Abled Persons Lunglei leh hmun hrang hrang atangin zirlai leh vohbikte an kal khawm a. cultural programme leh infiamna chi hrang hrang hmanga intihhlamna hun hman zui niin, vohbikte'n an thiam thil chi hrang hrang - zai, changvawn sawi, lam leh thil dangte entir a ni.

He hunah hian ALIMCO PMDK te chuan Assistance for Disabled Persons (ADIP) Scheme kal tlangin vohbik mi 22 hnenah leh Rashtriya Vayoshri Yojana (RVY) kal tlangin upa kum 60 chung lam mi 12 hnenah ri hriatna leh chet velna atana an hmanraw mamawh chi hrang hrang - wheelchair, bengdar, mitdel tiang, zakdawh tiang leh hmanraw dangte chu a thlawnin an pe a ni.

<><><>

VIKSIT BHARAT YOUTH PARLIAMENT

Viksit Bharat Youth Parliament-a Mizoram aiawh thlanna chu nimin khan Aizawl Vaivakawn venga Cultural Centre cum Auditorium-ah neih a ni a, a pumpuiah Angela Vanlalduhsaki, Mizoram Christian College, English department-a 6th semester zirlai, Aizawl Kulikawn West venga cheng chu pakhatna a ni a. Mizoram ai a awah dawn a ni.

Angela Vanlalduhsaki chuan a kalna leh zel turah mahni inrintawkna a pawimawh hlea a hriat thu a sawi a, a thalai pui te pawh, mahni inrintawkna nena an hmaa inchhawp thil te hmachhawn thei se a tih thu a sawi a ni.

Viksit Bharat Youth Parliament hawnna hun hi Mizoram Youth Commission Chairman Pu Malsawmzuala Ralte chuan a hmanpui a, thusawiin, rorelna ina thusawi dan hmanga inel tur thalaite chu mahni inthunun turin a fuih a. Mizoram mi an nih angin state hmasawnna tura eng emaw tala tha thawhtu nih tum tur leh chumi a thlenna tur chuan tum nget nei turin thalaite a chah a. Social media chu thil tangkai tak a nih thu leh engkim deuh thaw a

awm thu a sawi a, hetihruah hian khawih chin tawh neih a ngaih thu leh a tangkai zawnga hman a pawimawh thu a sawi a ni.

Viksit Bharat Youth Parliament hawnna inkhawmah hian Sports & Youth Services Secretary Pu Lalramsanga Sailo pawhin thu sawiin Viksit Bharat Youth Parliament chu kum 2019 atanga tan tawh a nih thu leh Prime Minister Pu Narendra Modi a’n thalaite hmasawnna tura a hmathlir zinga mi a nih thu a sawi a. Thalaiten India ram chu kum 2047-ah ram intodelh a nih theihna tura ngun taka an ngaihtuahna an sen theihna tura an fuankhawmna a nih thu a sawi a. Pu Lalramsanga Sailo chuan Mizoram chu tun hnaiah ram pum huapa National Youth Parliament kaihhnawih programme hrang hrangah a che tha hle tih a sawi bawh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

FIRE

Nizan zanlai pelh hnu dar 12:35 vel khan Diltlangah In 9 leh rellai 1 a kang ral vek a, in 1 chu thiah ani bawh.

Diltlang RO Pu Zirnghinga hnen atanga kan corr thudawn danin, kangmei hi helai hmuna Pu Lalchhuana in atanga chhuak nia ngaih a ni a, in kang zingah hian Dawr 4 a tel a, Thingzai engemawzat, Bike leh Vawk 1 a kang bawh.

<><><>

BANKING LAWS

Parliament chuan Banking Laws (Amendment) Bill 2024 a pass. Lok Sabha-in he bill hi a lo pass tawh hnuah nimin khan Rajya Sabha chuan a pass veleh a. Reserve Bank of India Act 1934, Banking Regulation Act 1949, State Bank of India Act 1955, Banking Companies (Acquisition and Transfer of Undertakings) Act 1970 leh Banking Companies (Acquisition and Transfer of Undertaking) Act 1980 te a siamtha dawn a. Dan thar hnuaiah chuan Bank account-a nominees awm thei zat chu pakhat atangin pali ah a tih pun theih tawh dawn a. Hei bakah hian he dan tharah hian bank te chu an auditor te lawmman zatah thuneihna a pe tawh dawn a ni.

Nimina House-a sawihonaah Union Finance Minister Nirmala Sitharaman-i chuan sawrkarin banking sector ti hmasawn turin insiamthatna tam tak kalpui tih a sawi a.

Pi Sitharaman-I chuan Bank-te hian an hlep tam ber tum thlengin cheng vaibelchhe nuai 1 sing li leh sang 1 chuang nikum chhungin an hmuchhuak tih a sawi bawh a ni.

<><><>

FOOD AND PUBLIC DISTRIBUTION

Union Food and Public Distribution Minister Pralhad Joshi chuan eitur pawlh danglam veng turin sawrkar chuan chak takin hma a la tih a sawi. Nimina Lok Sabha-a zawhbelhna chhangin Pu Joshi chuan sawrkarin eitur thianghlim lo hekna a dawn chuan uluk takin a chhui zui nghal zel tih a sawi a. Mihring ei tlak loh khawpa thianghlim lo a awm anih chuan thubuai siamsak nghal zel a nih thu a sawi bawk a ni.

<><><>